

明
詩
紀
事

明詩紀事

貴陽陳田輯

丁籤

王守仁 十七首

守仁字伯安餘姚人弘治己未進士授刑部主事改
兵部以忤劉瑾杖闕下謫貴州龍場驛丞起南刑部
主事改吏部歷員外郎中遷南太僕少卿進鴻臚卿
拜左僉都御史巡撫南贛進右副都御史論平宸濠
功擢南兵部尚書封新建伯贈侯諡文成從祀孔子
廟庭有陽明全書三十八卷

四庫總目守仁勲業氣節卓然爲文博大目明詩亦秀
逸有致

升菴集慎嘗反復晉書目王導爲叛臣頗爲世所駭
異後見崔後渠松窗雜錄亦同余近讀陽明紀夢詩
尤爲卓識其自序曰正德庚辰八月二十八日臥小
閣忽夢晉忠臣郭景純以詩示余且極言王導之奸
謂世之人徒知王敦之逆而不知王導實陰主之覺
而爲詩以紀其略詩云秋夜臥小閣夢遊滄海濱海
上神仙不可到金銀宮闕尙嶙峋中有仙人芙蓉巾
顧我宛若平生親欣然就語下烟霧自言姓名郭景
純攜手歷歷訴衷曲義憤感激難具陳切齒尤深怨
王導深奸老猾長欺人當年王敦覬神器導實陰主
相緣貴不然三問三不答胡忍使敦殺伯仁寄書欲
拔太真舌不相爲謀敢爾云敦病已篤事已去臨哭
嫁禍復賣敦事成同享帝王貴事敗仍爲願命臣幾
微隱約亦可見世史掩覆多失真
藝苑卮言王新建詩如長爪梵志彼法中錚錚動人
王世貞讀書後伯安之爲詩少年時亦求所謂工者
而爲才所使不能深造而衷於法晚節盡舉而歸之
道而尙爲少年意所累不能渾融而出於自然其自
負若兩得而幾所謂兩墮者也以世眼觀之公甫固
不如以法眼觀之伯安瞠乎後矣
錢德洪陽明年譜先生謫龍場驛丞至錢塘劉瑾遣
人隨偵先生度不免乃託言投江以脫之因附商船

遊舟山遇颶風一日夜至閩界登岸至一寺寺有異
人嘗識於鐵柱宮約二十年相見海上至是出詩有
二十年來消息我先聞之句與論出處
且將遠遊其人曰汝有親在萬一瑾怒逮爾父誣以
北走切南走越何以應之因為誓得明夷遂決策返
先生題詩壁間曰險夷原不滯胸中何異浮雲遇太
空夜靜海濤三萬里月明飛錫下天風因取問道出
武夷返錢塘赴龍場驛
西湖遊覽志守仁之既擒宸濠也忽傳王師已及徐
淮送乘夜過發至錢塘陳陳憂慄作詩云鷺鷥高林
晷氣清竺天石壁雨痕晴客來湖上逢雲起僧住峰
頭話月明世路久知難直道此身那得尚浮名移家
早定孤山計種果誅茅卻易成頃之王師遣人追宸
濠復還江西遂謝病居淨慈寺
鄭露赤雅文成謁伏波廟詩樓船金鼓宿烏蠻魚麗
羣舟夜上灘月縵旌旗干嶂靜風傳鈴鐸九溪寒荒
夷未必先聲振神武由來不殺難相見虞廷新氣聚
兩階干羽在雲端少時夢中有詩云卷甲歸來馬伏
波早年兵法賢毛儒雲迷銅柱雷轟折六字題詩向
不磨文成身後謗興創爵與薏苡之事略同
列朝詩集先生在郎署與李空同諸人遊刻意爲詞
章居夷以後講道有得遂不復措意工拙然其俊爽

山中立秋日偶書

之氣往往通出於行墨之間
 明詩選李舒章曰文成才情振拔少年頗擅風雅自
 講學後多作學究語乃不堪多錄
 田按文成謫吾黔龍場驛丞時提學副使席書修葺
 會城書院率諸生以師禮事之是時風氣未開文成
 舉知行合一之教紛紛異同罔知所入厥後文成弟
 子道林蔣信以副使提學貴州重舉陽明學旨以教
 諸生貴陽心菴馬廷錫獨有悟入清平淮海孫應鰲
 見知於提學徐樾即傳陽明心齋之學又走桃岡印
 證於道林思南同野李渭自傳家學亦謁道林陳樓
 上樓下光景終明之世吾黔學祖斷以文成爲開先
 矣文成居龍場有龍岡書院寅賓堂何陋軒君子亭
 玩易窩陽明小洞天居會城有文明書院居夷集中
 有諸生來詩云門生頗羣集樽俎亦時展講習性所
 樂記問復懷視諸生夜坐詩云講習有真樂談笑無
 俗流諸生詩云嗟我二三子吾道有真趣胡不攜書
 來茆堂好同住夜宿汪氏園詩云他年貴竹傳遺事
 應說陽明舊草堂今祀先生於會城之貴山書院城
 外之芙風山藏皮遺像焉斯不祧之俎豆矣

風吹蟬聲亂林臥驚新秋山池靜澄碧暑氣亦已收青峰出
白雲突兀成瓊樓袒裼坐溪石對之心悠悠倏忽無定態變
化不可求浩然發長嘯忽起雙白鷗

登泰山

窮厓不可極飛步凌煙虹危泉瀉石道空影垂雲松千峰互
攢簇掩映青芙蓉高臺倚巉削傾側臨崆峒失足墮烟霧碎
骨顛崖中下愚竟難曉摧折紛相從吾方坐日觀披雲嘯天
風赤水問軒后蒼梧叫重瞳隱隱落天語闔闔開玲瓏去去
勿復道濁世將焉窮

答汪抑之二首

北風春尙號浮雲正南馳風雲一相失各在天一涯客子懷

往路起視明星稀驅車赴長阪迢迢入嵐霏旅宿蒼山底霧
雨昏朝彌閒闕不足道嗟此白日微切磋懷良友願言毋心
違

聞子賦茆屋來歸在何年索居間楚越連峰鬱參天緬懷巖
中隱磴道窮扳緣江雲動蒼壁山月流澄川朝採石上芝暮
漱松間泉鵝湖有前約鹿洞多遺編奇子春鴻書待我秋江
船

龍岡新構

有序

諸夷以予穴居頗陰溼請構小廬欣然趨事不月而
成諸生聞之亦皆來集請名龍岡書院其軒曰何陋
謫居聊假息荒穢亦須治鑿巖薶林條小構自成趣開窗入

遠峰架扉出深樹墟寨俯透池竹木互蒙翳畦蔬稍漑鋤花
藥頗雜時宴適豈專予來者得同煎輪奐非致美毋令易傾
敝

無寐

窮厓多雜樹上與青冥連穿雲下飛瀑誰能識其源但聞清
猿嘯時見皓鶴翻中有避世士冥寂棲其巔緊予亦同調路
絕難攀緣

秋夜

樹暝栖翼喧螢飛夜堂靜遙穹出晴月低檐入峰影惺然坐
幽獨恍爾抱深警年徂道無聞心違迹未屏蕭瑟中林秋雲
凝松桂冷山泉豈無適離人懷故境安得駕雲鴻高飛越南

景

香山次韻

尋山到山寺得意卻忘山巖樹坐來靜壁蘿春自閒樓臺星
斗上鐘磬翠微間頓息塵寰念清溪踏月還

尋春

十里湖光放小舟謾尋春事及西疇江鷗意到忽飛去野老
情深只自留日暮草香含雨氣九峰晴色散溪流吾儕是處
皆行樂何必蘭亭說舊遊

化城寺

雲端鼓角落星斗松頂袈裟散雨花一百六峰開碧漢八十
四梯踏紫霞山空仙骨葬金柳春煖石芝抽玉芽獨揮談塵

拂烟霧一笑天地真無涯

歲暮

兀坐經旬成木石忽驚歲暮還思鄉
高檐白日不到地深夜黠鼠時登牀
峰頭霽雪明草閣瀑下古松閒石房
煥鶴洞猿爾無恙春江歸棹吾相將

移居勝果寺

江上但知山色好峰迴始見寺門開
半空虛閣有雲住六月深松無暑來
病肺正思移枕簟洗心兼得遠塵埃
富春咫尺煙濤外時倚層霞望釣臺

羅舊驛

客行日日萬峰頭山水南來亦勝遊
市谷鳥啼村雨暗刺桐

花暝石溪幽，蠻煙喜過青楊瘴。鄉思愁經芳杜洲，身在夜郎家。萬里五雲天北，是神州。

過天生橋

水光如練落長松，雲際天橋隱白虹。遡鶴不來華表爛，仙人一去石橋空。徒聞鵲鴛橫秋夕，謾說秦鞭到海東。移放長江還濟險，可憐虛卻萬山中。

陸廣曉發

初日瞳瞳似曉霞，雨痕新霽渡頭沙。溪深幾曲雲藏峽，樹老千年雪作花。白鳥去邊回驛路，青崖缺處見人家。遍行奇勝才經此，江上無勞羨九華。

南菴次韻

隔水樵漁亦幾家。緣岡石路入溪斜。松林晚映千峰雨。楓葉
秋連萬樹霞。漸覺形骸逃物外。未妨遊樂在天涯。頻來不用
勞僧榻。已僭汀鷗一席沙。

山中示諸生

桃源在何許。西峰最深處。不用問漁人。沿溪踏花去。

何塘一首

塘字粹夫。懷慶衛人。弘治壬戌進士。改庶吉士。授編
修。歷修撰。謫開州同知。改東昌。遷山西提學副使。改
松江。歷南太常少卿。擢工部侍郎。改戶部。禮部。進南
右都御史。贈工部尚書。諡文定。有柏齋集十一卷。

四庫總目。塘論學。一以格致爲宗。集中送湛若水序謂
甘泉以存心爲主。予以格物致知爲先。非存心固無

以爲格致之本物格知致則心之體用益備其生平
得力在此故當時東南學者多宗王守仁良知之說
而瑯獨以躬行爲本不以講學自名然論其篤實乃
在講學諸家上

懷陸子淵

共誰虛室細談玄東望江雲意渺然憶昔華年今白首不堪
吟對菊花天

湛若水 三首

若水字元明增城人弘治乙丑進士改庶吉士授編
修歷侍讀南祭酒擢禮部侍郎進尙書改兵部謫文
莊有甘泉集三十二卷

田按甘泉詩莫名其體似道家演訣而非訣似禪家
說偈而非偈蓋參合宋擊壤明定山諸派而成者也
若北風吹湖船帆挂南嶽樹桃李默不言流鶯語春
風漢陂名勝在不欠杜陵詩夜甕分江水春茶煮楚

雲何嘗不清脆但集中不可多得耳

雨中坐樓上書所見

濁酒不得意新詩空自酬冥冥騎白日鬱鬱坐窮愁飛鳥衝
風墮歸雲被雨留小舟還數點寂寞在荒洲

遊羅浮

聞吹一夜動幽懷直踏飛雲萬丈崖翠靄浮雲白日暝虹橋
有路青天來三月二月春過半千山萬山花正開笑問仙源
杳何許雲濤浩浩不堪裁

水簾洞

千秋雲谷還歸我三三求羊作近鄰莫種桃花臨水岸引人
來問武陵津

崔銑 一首

銑字子鍾安陽人弘治乙丑進士選庶吉士授編修
以忤劉瑾改南吏部主事瑾誅復故官歷侍讀進南
祭酒以劾張璉桂萼失帝旨令致仕用薦起少詹事
兼侍讀學士擢南禮部侍郎贈禮部尙書諡文敏有

洹詞十二卷

四庫總目銑力排王守仁之學謂其不當舍良能而談
良知故持論行己一歸篤實其爭大體劾張璉桂萼
風節表表亦不愧其言所作政議十篇準今酌古無
儒生迂闊之習他若漫記十條可以補宋史之未備
謫傳兩則可以靖明代之浮言而岳飛論一篇稱飛
之急宜奉詔尤識大體蓋不以文章著而文章自可
傳也第十一卷中有嚴嵩鈐山堂集序似涉南園作
記之疑然嵩集載此序題嘉靖己亥據明史嵩傳是
時方爲禮部尙書未操國柄尙無由預識其姦是猶
司馬光之於王安石非陸游之於韓侂胄矣

田按文敏講學尊朱抑陸與陽明宗旨不合其論明
以來詩文源流云洪武文臣皆元材也永樂而後乃
可得而稱數方天台辭若蘇氏言必周孔大哉志乎
東里入閤司文既專且久詩法唐文法歐依之者效
之弘治中南城羅玘思振頽靡獨師韓文其艱思奇
句偉哉武功康海好馬遷之史入對大廷文制古辯
元老宿儒見而驚服其時北郡李夢陽中陽何景明
協表師法曰換無騷唐無賦宋無詩二子抗節退舉
故能成章李之雄厚何之逸爽學者尊如李杜焉惟
於西涯會不齒及豈非不滿其相業乎其序羅景鳴
集云往西涯公處劉瑾張永之際不可言臣節矣士
患其私猶曲貨而與之幾亡是非之心而弇州藝苑
厄言乃修談火城行觴之遇何哉

贈謝茂秦

三月清江上翩翩兩度來
搗詞傾玉海弔古賦銅臺
歧路楊朱淚江湖李白杯
令公今謝事回首尙憐才

四溟詩話崔後渠贈子詩楊朱李白自然的對戎昱
詩曰衛青師自老魏絳賞何功較之後渠精確不及

明詩紀事

貴陽陳田輯

丁籤

石存禮 四首

存禮字敬夫益都人弘治庚戌進士官紹興知府

四庫總目海岱會集十二卷明石存禮藍田馮裕劉澄甫陳經黃卿劉淵甫楊應奎八人唱和之詩也嘉靖乙未丙申間經以禮部侍郎丁憂里居田除名閒住淵甫未仕存禮等五人並致仕乃結詩社於北郭禪林後編輯所作成帙冠以社約八人皆不以詩名而其詩皆清雅可觀無三楊臺閣之習亦無七子摹擬之弊觀其社約中有不許將會內詩詞傳播違者有罰一條蓋山間林下自適性情不復以文壇名譽爲事故不隨風氣爲轉移而八人皆閒散之身自吟詠外別無餘事故互相推蔽自少疵類其斐然可誦良亦有由矣

古夫于亭雜錄吾鄉六郡青州冠蓋最盛世宗時林

下諸老爲海岱詩社倡和尤盛其人則馮閭山黃海亭石來山劉山泉范泉楊繩谷陳東渚而卽墨藍北山亦以僑居與焉倡和詩凡十二卷無刊本余近訪得鈔本詩各體皆入格非浪作者閭山卽四馮之父文敏琦之曾祖山泉范泉則文和珩之孫也田按敬夫五言古詩有柴桑遺韻

幽居

幽居近城府而無城府迹耕鑿樂歲時樵牧共朝夕鳥啼芳樹深犬吠村巷僻乘閒或杖屨有酒邀鄰客埽石安尊尊藉草爲茵席陶然忘外求所願從所適

石門

杖屨從所適愛此石門行川原斂飛雨佳木當春榮興言磐石間坐看雲氣生徘徊日將夕山水有餘清

夏日山中訪隱士

治世有隱淪幽居出塵境逍遙物外心
馳蕩山中景時豐官稅輸野曠人迹
屏雨晴農事餘禾苗綠幾頃曉來門
尚關鳥啼夢初醒客至啟南軒坐消
白晝永遺編共討論微言發深省
高林暑氣無清風襲衣冷盤桓興未
闌夕陽下西嶺

秋意

草蟲階下鳴聽久猶未歇掩卷坐沈
寥秋聲振林樾人生無幾何爲樂不
可輟風吹浮雲開送我半窗月逍遙
步前庭孤螢自明滅

劉澄甫 二首

澄甫字子靜壽光大學士珣孫正德
戊辰進士官

山西參議有山泉集

漁洋詩話花林睡在雲門山南益都山水佳處也山泉翁詩云山藏柳市無車馬水隔桃源有子孫馮宗伯北海鍾司空龍淵皆屬和

君馬黃

君馬黃臣馬白君馬日立赤墀中臣馬當行雪山磧玉勒嘶
秋風凋弓抱明月十二闌中雲錦花三千里外胡風沙香闌
紅顏泣成血邊城白骨多如麻交河北流無青草年年走馬
交河道

西洲曲

采蓮南渡頭采菱西洲口日落不逢人秋雲重回首

劉洲甫一首

洲甫字子宏澄甫弟正德庚午舉人官漢陽知府有

海岱稿

半山亭

名亭積翠通幽徑峭壁陰崖掩夕暉夜雨似疑山鬼聽
惟見海鷗飛門當澗壑挂寒瀑棟宿雲霞落草衣一賦薜蘿
招隱去逍遙塵外澹忘歸

馮裕一首

裕字伯順臨朐人正德戊辰進士累官雲南按察副
使有集

冬月過范泉精舍

面面青山一畝宮菊籬莎逕細泉通土階剩見藤蘿月石檻
徐來松竹風盡日讀書應自領閉門覓句許誰工黃柑紫蟹

葡萄酒常對清狂鶴髮翁

黃卿

四首

卿字時庸益都人正德戊辰進士累官江西布政使

有編茗集

田按編茗詩特矜練在海岱會集中別自一格所著編茗詩話惜今不見

洛陽道

山川開鞏洛九日會中州
芳樹夾馳道奇花簇酒樓
衣冠盛祖饒綺繡相追遊
蘇秦佩印日車馬去如流

間蔣侍御將至

松寺衣冠會高軒
多繡遲碧雲斜日合芳草入春滋
馬飲溜澗曲旌留管晏祠
雷琴先拂拭倩客繫朱絲

遊寶峰寺

蘭若登遊開積翠諸崖環拱鬱嵯峨殿雲依樹鶴秋唳塔日
穿林騰午過異代金容雄上黨中天花雨灑漳河憑師欲發
珠林祕北獻蓬萊意如何

三關書事

限夷巖赴黃花嶺石壁重關雁度愁直北蕭蕭纔百里黑山
枯草盡邊頭

楊應奎一首

應奎字文煥益都人正德辛未進士官南陽知府有
澠谷集

閔扇郎

秋風歇團扇郎心中道變態慙度歲寒夏至還相見

陳經一首

經字伯常益都人正德甲戌進士累官兵部尙書加太子少保

山行過僧菴不入

羅逕盤青霽松門隱碧岑野雲看不極禪榻倦重尋樹斷浮幢影巖虛落磬音何須支遁語已覺淨塵心

朱朴十二首

朴字元素海鹽布衣有西村集三卷

四庫總目朴近體格調清越閉戶苦吟人品已高其詩品茗茗物表

構李詩繫元素性耽詩自少至老未嘗一日廢兼善繪事興到輒作雲林小幅其詩孤清警拔頗具排古

蕩今之致一時林下諸賢並邀入社與錢東畚徐豐
厓吳南溪陳勾溪徐東濱陳古厓劉海邨鍾西皋釋
石林爲瀛洲十老之會推元素爲首後更得董蘿石
許雲邨沈紫峽鍾彥村及僧秋江雪江選辰命篇且
命畫士繪圖以傳焉

田藝蘅海鹽文獻志西村善繪繪成作蠅頭楷題詩
其上

居易錄海鹽朱朴西村詩雖未脫臨摹之迹亦有佳
句七言如數峰蒼翠寺門迴三月落花溪水深棟花
風過蠶蛾老麥秀城深雉子斑千年玉骨洲壘萬
里堅城少保家雁來關塞暮天碧龍起江湖秋水腥
巫峽曉風蜚短鬢楚江秋水練長裙山圍野色迷秦
駐海送潮頭上浙江落花時節已寒食流水陂塘還
祓除白雲出岫澗如掃紅藕作花香可憐月明蒼壁
紫仙舫風細幔亭流白雲此例皆佳

田按嘉靖壬寅徐東濱結小瀛洲社會西村以海濱
一老清吟雅製領袖騷壇仿西園故事倩畫士陳詢
繪圖於立相語者爲西邨豐厓西皋聚首閱卷者爲
東畚南溪勾溪挾童過橋者爲海邨欲行且顧者爲
古厓坐以待奕者爲東濱石林東濱序所謂衣冠萃
止猷酬乃行四美具而二難并三壽朋而五福介化
無愧於軒裳隱有光於邱壑洵一時勝事也

蘿石山人惠松花餅

山風吹林時雨歇雲邊埽落黃金屑并刀割蜜香在手和作
銅盆百規月老夫肺病方作殃一片入口心胸涼舌根猶含
兔絲冷腸腑已透龍髯香蘿翁蘿翁最知我白紙奚囊封一
裹金莖沆瀣常恐詫玉碗醅酥聊許可山中老松三百株崖
蜂醞液流醴醕春來更製數十斛乞與一斗知能無

謝王雨舟惠靈壽杖

武當山高幾萬丈中有千年靈壽杖金光玉芝秀所鍾生在
青霞石崑上雨舟先生道者流贈我一枝東海頭琅玕潤滑
鐵堅瘦昂首屈項蒼精虬老夫病足如跛隨藉此扶持少顛
蹶朝出橫拖石壁雲暮歸倒挂溪橋月乘舟著篙馬著鞭凌

高步下無不便爲尋短句謝遠意遠逕啄碎青苔錢不愁化
龍忽飛去不願提攜朝玉陛但使長挑沽酒錢日日登堂共
君醉

韋邨爲常州吳通府題

長州吳別駕家在韋花莊好雨煙叢綠涼風露葉黃邨通
角里流水入吳鄉手種沙邊樹他年繫釣航

石屋洞隆公房

我愛巖居宿因過衲子家山蔬和葛粉野飯間胡麻水帶煙
霞味茶收穀雨芽不知春早晚開到木蘭花

上巳同友出郊

三月三日出郭行風和日暄天氣晴柳泥補巢舊家燕隔水

喚春何處鶯。塢頭小姬酒正熟。道傍古墳人自耕。勸君行樂
貴及早。明日清明花滿城。

懷句溪

苦憶句溪溪上翁。暮年多病少過逢。盤殮不乏憐牙健。世事
無聞愛耳聾。誰共青燈分半榻。自梳白髮對孤峰。滄洲寂寞
鷗鳬散。目送征鴻意萬重。

扶杖

扶杖東皋望遠山。物華消息與情關。棟花風過鸞鵲老。麥秀
城深雉子斑。誰氏墓田荆棘裏。新亭館畫圖間。道傍惟有
寒松樹。吹盡春風只舊顏。

楚江秋曉

練淨澄江露未稀
苦吟猶憶謝玄暉
六朝往事青山在
三楚空城白鷺飛
霜落水部菰米熟
石高沙岸柳條稀
重華一去無消息
目極蒼梧淚滿衣

茶谷山房

池臺六月興堪乘
六曲闌干取次憑
簾外午陰緣澗竹
水中人影過橋僧
催詩硯滴銀牀露
醒酒瓜嘗玉椀冰
白社故人閒散地
不妨來往喜相仍

東濱席詠芍藥

憶昨臨軒把酒看
過年花發又憑闌
紅芳有約春筵在
白髮無情曉鏡寒
雲擁畫屏籠繡幄
露涵香氣滴銅盤
舊家池館棠陰下
未許風光讓牡丹

歌風臺

酒闌歌徹大風詞不是鴻門舞劍時
萬里中原皆漢土高皇猶有故鄉思

碧雲寺

塢影蕭蕭夕照間碧雲黃葉滿秋山
空堂夜冷無燈火惟有貧僧乞米還

陳鑑四首

鑑字用明海鹽布衣有句溪集

橋李詩繫句溪詩鮮芳幽備
田按西村句溪野趣逸情風味略近

雨中喜西村諸君見過

深酌看清雨田家無好春年光餘逕草
風味只溪蘋此日有

限日幾人無事人醉眠君未去交誼向吾真

訪石林

海雨溼山木野泉通竹籬偶隨流水去恰值道人期坐久日
移午來稀花笑遲小園春事歇滿舉送春卮

句溪暮歸

淨漱滄浪坐晚涼浩歌篷底又斜陽貧能到骨心方逸懶得
成癡事盡忘夢裏風煙詩帙亂手中湖海釣絲長東風吹入
句溪棹碧草清波十里香

讀靖康史

日短中原雁影分空將鑕子寄曹勛黃龍塞上悲笳月祇隔
臨安一片雲

錢琦 一首

琦字公良海鹽人正德戊辰進士授盱眙知縣歷南
刑部郎中出爲臨江知府改思南有東畚集十四卷
遺懷

手種篋簪傍水邊露華抽碧動江煙主人空有他鄉夢辜負
青青玉可憐

吳昂 一首

昂字德翼海鹽人弘治乙丑進士授宜城知縣改新
建歷兵部刑部郎出爲福建按察僉事終布政使有
南溪集

元旦

晴窗罷檢白雲篇自熱名香起篆煙晚興偶移溪上屐凍梅
含雪報新年

徐泰 一首

泰字子元海鹽人弘治甲子舉人授桐城教諭改蓮
州學正遷光澤知縣有玉池橐

田按徐子元詩談評騭洪永以來詩人頗稱眞賞所
輯明風雅四十卷搜採極博楊升菴譏其浮濫未爲
定評也

秋夜澈湖望月

澈湖湖上桂花秋海月當年滿畫樓彷彿錢塘六橋夜至今
人說小杭州

徐咸 二首

咸字子正泰弟正德辛未進士授沔陽知州遷襄陽知府有東濱三稿

和石門懷陳句溪沈紫硤

紫硤逃名士句溪遁世翁兩峰盤谷景一曲鑑湖風雪映吟髭白梅薰酒面紅何時過蕭寺共聽五更鐘

西村畫

平蕪漠漠遠山青楊柳風多水氣腥好似衡陽舊遊處蒸湘斜抱合江亭

鍾梁一首

梁字彥材海鹽人正德甲戌進士授刑部主事歷員外郎中諫南巡杖闕下尋出知濟南府改南昌有西

皋集

暮春

楊柳依依杜若香
陂塘水煖浴鴛鴦
多情惟有春來燕
又逐東風入草堂

陳瀛一首

瀛字古厓海鹽人
國子生授宛平主簿
遷龍巖知縣
雪夜過妙光寺

朔雲卷水氣憑陵
此夕山陰興已乘
高竚短蓑還出浦
滿湖風雪夜尋僧

明詩紀事

貴陽陳田輯



史鑑十二首

鑑字明古吳江人有西村集八卷

四庫總目史鑑詩落落無俗韻

匏翁家藏集明古於書無所不讀而尤熟於史論千載事歷歷如見有劉道原之精時事人言得於間見筆之成編有洪容齋之博爲文紀事有法詩不屑爲近體冥搜苦索欲追魏晉而及之家居水竹幽茂亭館相通客至陳三代秦漢器物及唐宋以來書畫名品相與鑒賞好著古衣冠曳履揮塵望之者以爲列仙之傳也
靜志居詩話西村才名亞於石田然以詩論刻意學古似當勝沈一鐸
田按西村集五字詩爲勝七言斷句亦有風韻

鍾希哲者台州人也妙於傳神賦詩紀之

人生無百年五十又過一去者日以多來者日以偪情慾與
寒暑晝夜相剽賊徒行已須杖短髮不任櫛顧茲孱弱軀那
爲久存物一朝隨化盡形容不復識鍾生妙傳寫爲我聊把
筆傳染借丹青經營自胸臆精神與形似毫髮無所失端如
鏡中影恍若水底石大均斯賦形其理固莫測孰知毫采功
妙奪造化力我聞先正言自治不外飾求真旣爲妄望久甯
非惑君看古人像存者無百十惟能慎厥修庶幾爲永則

重陽庵

我遊重陽庵不見重陽子丹成飄然與世辭騎虎遨遊太清
裏三山等鰲簪四海猶杯水萬里一瞬間千年片時耳後人

作屋青山頭重陽不來人自遊長風蕭蕭日杲杲醉卧白石
臨清流青衣洞深且幽銜花野鹿鳴呦呦仰招白雲喚白鷗
吾將與爾仍丹邱

懋奉慈庵

松頭孤鶴下石罅亂泉鳴入鳴疑無路逢山屢問名客行忘
遠近僧老廢將迎一笑出門去五湖風浪生

飲烏步顧氏村居

去郭逾千步瀉風自一鄉日斜魚市集歲久水祠荒草色遙
連浦花枝半出牆西南山更好欲渡苦無梁

孤山

一上孤山望春陂帶夕曛西來千嶂合南下兩湖分路遠前

朝寺雲埋處土墳
畫船歸去晚歌吹月中聞

經上海縣

岸崩橋易圯水濶渡難招
浦淑遙通海舟航半趁潮
市聲先旦集野樹未霜凋
明月如相識依依伴寂寥

冬夜逢臨川聶雲章話舊

頻年違晤語此日賁林垆
鬢髮綠愁白家山入夢青
功名成潦倒書劍尙飄零
明發松陵道離歌惜共聽

聚遠樓

新起高樓九溪上無邊風景在
虛櫺太湖一水際天綠洞庭
兩山終日青帆帶夕陽來冉冉
雁拖秋影入冥冥何人卷幔
吹簫坐明月滿空涼露零

題小景送人歸宜興

朝下銅官去暮向銅官歸春風被花惱滿山蝴蝶飛

蘇隄對酒次沈啟南韻

雨後滿湖生翠茗畫船歸去水迢迢生憎蘇小墳前草野火
曾經幾度燒

何克廉宅觀妓

一曲清歌遶畫梁春風吹散舞衣香酒酣卻笑蘇州守何事
樽前欲斷腸

震澤竹枝辭

震澤雨晴添水波郎船將發唱吳歌誰知三萬六千頃不及
儂愁一半多

方太古

六首

太古字元素蘭溪人有寒溪子集

吳之器藝書王文成嘗過太古擷蔬食之次日報謁
亦以蔬進太古正色曰故人山人草具固爾伯安微
侯也胡爲乎山人具文成遜謝改治具嘗與唐文襄
相失會文襄以太宰召貽詩曰世態經秋葉浮名下
瀨船文襄爲之悵然其任放如此
四友齋叢說孫太初過江人未有知者方寒溪一見
大爲延譽太初詩格本高又儀狀軒舉丰神俊異後
聲譽遂出寒溪之右
田按太古負氣傲岸山澤俊人詩亦灑落不凡

夜坐喜晏伯謙談禪

海月未出山清宵起燈燭草坐偕道流談禪暢幽獨雲岩一
何深心遠境自足冷然忽成悟風吹隔窗竹

寒食

春光二月忽三月天氣單衣又夾衣樹樹梨花相對發家家燕子總雙飛客懷不慣逢寒食歸路還思住翠微溪上柳條新弄碧煖風晴日待儂歸

憶溪上梅花

去年冬早溪流淺重憶開時誰主張一樹隔簾雲弄影萬花同夢雪生香最多畫意山松閣占斷風情水竹莊何日歸來酬汝願小橋秀句放清狂

讀孫太初去冬所寄雜詩

發笥得詩肝肺熱山人與誰同住山碧雲行空月皎皎春風滿地花斑斑昔年鍼綫只自好今日門戶如予閒愛說輕身事修煉吾當爲汝解連環

玄墓山上方

危欄倦倚帶斜陽
今夜禪床借上方
七十二山何處是
洞庭烟水正茫茫

客散

客散書堂秋日涼
山風吹雨葛花香
竹床藤簟茶初熟
消受山人午睡長

程玄輔一首

玄輔字叔朋歙人

懷楊儀部君謙

故人久無書
山川隔淮楚
相思不可搗
獨卧江東雨

朱曜一首

曜字叔陽松江華亭人以貢授清江鹽課提舉有玉

洲集

題陳清之畫

釣罷煙江發棹歌夕陽歸路柳風和明朝挾網來須早水漲

桃花魚正多

李孔修一首

孔修字子長順德布衣

霍娟渭崖集子長少從白沙游颯然鶴思不伍於世
破廬薄產蔬食不繼未嘗作皺眉作詩寫字自爲一
家或觀眺山水間歸而圖之見者爭愛而酬之曰李
子長畫云平居管甯帽朱子深衣廿年足不越城闕
有古林逋魏野種放孺子雲卿之風子長父歿庶母
改適民家誣子長沒其產縣官繫鞠之子長無言迫
之供操筆曰母告委是情真縣官疑之覆鞠得其情
乃知其賢禮敬之少年時輸糧於官縣官異其容止

詢姓名不答惟一拱手縣官叱曰何物百姓乃爾拱
手耶阿之退又再拱手縣官怒答之五竟無言以出
白沙先生知之戲之詩曰驢背推敲去君知我是誰
如何又兩手剛被長官答子長之詩曰月明海上開
尊酒花影船頭落釣蓑白沙亟稱之曰後廿年恐子
長無此句

遊西樵山

奇花不盡留春久宿雨纔收見月新
閣外淩雲高去鳥山中問道遠邀人

謝承舉 六首

承舉初名璿字文卿更字子象上元人有東村稿采

毫錄西遊錄在客稿日得錄廣陵雜錄湘中漫錄

顧璘息園存稿謝子象入歲善詩客命賦暮秋援筆
立就至紫塞風寒雁叫霜客驚嘆呼爲奇童稍長從
吳元玉學見其深林下馬蒼苔滑野寺入門秋爽多
句擊節鑒賞柴墟儲靜夫爲南考功作檀園詩社引

子象與諸文士聯句往往出奇絕眾常屈一座兄弟
四人各善詩畫風流清邁時擬謝庭諸郎
金陵瑱事李著學畫於沈啟南學成歸家只傲吳次
翁之筆以售緣當時陪京重次翁之畫故耳謝子象
題其畫云銀河無路泛仙槎一舸空江此是家殘月
照人秋睡穩不知清夢在蘆花
田按盛仲交合史癡翁金赤松詩爲江南二隱稿子
象詩品當在二人之上癡翁赤松自以書畫重耳

月子河卽景

風便小舸輕如葉中流浪平無驚嗟溪女捕魚水禽起野叟
餐神村鼓搗丹青剝壁見古廟雞犬上樹知人家秋江景物
看不厭霜菊挂岩開紫花

揚州馬次甫見過病中以詩道意

三百江程一日風又從橋口繫孤篷忽驚深巷來佳客不厭
寒門問病翁舊事多傷春鬢白好詩留翦夜燈紅階前卽便

呼兒拜眼底誰人識馬融

夢中作

瓊瑤洲畔拾芙蓉玉女青童兩隊從明月一江天似水夜涼
騎鶴下西峯

睡起口占

茶淪花磁洗睡魔枕流亭上暮涼多狂飈吹下西山雨一片
秋聲戀敗荷

送劉文獻

石城柳色春猶淺錦席燈花夜未分明發北風江棹穩思君
又隔洞庭雲

寄何園樵

山中酒熟君思我雪裏詩成我寄君東望海門三百里不勝
離思亂江雲

畫雁

湖上蘆黃水拍天湖頭人去少書傳秋窗正有孤眠客莫送
哀聲到枕邊

送蘇子升往萬川

二首

荊州西去接夔門三峽波濤不可論一曲驪歌臨別酒楚雲
巴樹總銷魂

采石江頭芳草淒峨眉積畔曉猿啼扁舟穩泛桃花水好逐
春風訪懷西

董溪

二首

湮字復宗一字子濤海鹽布衣

構李詩繫蘿石少慷慨慕義家貧工詩與沈周孫一
元鄭善夫諸公遊放浪山水年六十八聞王陽明講
學山中以杖屨瓢笠詩卷訪之入門長揖上坐陽明
異其氣貌又知其爲蘿石也與之語連日夜蘿石悚
然起嘆執弟子禮盡棄舊學所游者請之蘿石曰從
吾所好而已更號從吾道人未復參證內典嘆曰今
客始得歸矣與釋法聚結社海門山寺許相卿曰始
余見從吾子專於詩遺其家甚難之後志於道遺其
詩甚愧之終入於佛喀然自遺也愈益怪之學三變
而卒歸於空有詩云我非汗世中者偶來七十七
春秋自知此去無些染一迥天泉月自流其有得於
道者歟

宿韜光次王明谷

看山意不盡
宿禪家坐石雲生袖談經天雨花開虛松
夜奏林煖筍秋芽老得王濛癖逢僧不厭茶

野眺

雲山重疊帶江邨
花落水流天氣昏
應有野人春卧穩
流鶯啼過不開門

周恭一首

恭字寅之崑山人有和中峰梅花詩一卷樵玉稿十

卷

梅花主人歌

山迢迢兮溪曲曲
中有人兮結茅屋
玄鶴無聲兮花渺茫
主人吹笛兮花斷腸

梅花草堂集周寅之自號梅花主人性嗜梅年四十始得數畝之宅週遭有池池立叢篠樹梅環之每寒日瞳瞳六花將笑香雲旣歛瘦影橫斜輒歌小辭樂之予嘗見沈啟南作梅花主人圖用梅花道人墨法卷高尺有咫而橫潤可一丈五七許矮屋壓頭野竹亂插成籬落屋外冷蕪疏枝嫣然欲笑檐楊寒寂主

丁鑑卷十五

八

人坐其間隻袖垂膝有撚鬚苦吟之致門通曲徑徑接小橋隔水數峯亂插雲外山嵐隱現都潑青黛色散木叢立莽互不可辨一山勢峻而近峯極隱殿閣浮圖直倚霄漢宛然玉山風景蹙展問徑始可得梅花主人隱居所在啟南故不識主人主人嘗以一詩爲贊居然得之雖復一時弄翰彼此慕尚之情想其風格蓋亦翛然物外者耶

薛章憲一首

章憲字堯卿江陰人有鴻泥堂小稿八卷續稿十卷

遊張公洞

東家蹇驢許借我薄暮結客山中來有時山鳥獨自語無數野花相映開側身蟻行入窸窣累足魚貫攀崔嵬僕夫起餐覓歸路已去難忘首重迴

謝復一首

復字一陽祁門人有西山類稿五卷

山居

衰疾朝慵起荆扉午未開雲閒不飛去鳥倦自歸來果熟從人摘松疏擬更栽狂歌白日永獨步前山隈

魏傅二首

傅字達卿鄞人以貢授石城訓導有雲松詩略

輓長清李處士

芒屨竹杖謝風煙江郭南頭卧一廬別館花開人醉酒小窗月落客成篇誰圖栗里高風在惟有龍門盛會傳惆悵故人思舊處數聲鄰笛夕陽天

少年行

蔡弓插羽氣如虹白馬翩翩過市中解射飛鵬向沙磧姓名
近報建章宮

倪復二首

復字汝新鄞人有畏齋稿

田按畏齋甫上耆宿著書甚多詩亦琅琅雅音

讀史

飄風起末路日色無光輝猛虎厭獸肉騶虞恆苦飢羣狐處
中堂麒麟受羈縻陳寶竟火滅衣冠落塗泥上天杳且冥是
非何所容古來共嘆息後世成著龜

感寓

風高殘暑清露白秋夜長蔓草不復滋蝻蛄弔流光繁思縻

中祿戚何能忘，鸞刀未發，劓割摧鋒鏃。寶鎖匣中埋垢汗，何由明元運。自淪忽，白日去茫茫，瑤華恐不實。泯滅沈風霜，安得松柏姿。歲寒色蒼蒼。

史自守

一首

自守字端仁鄞人

過石碑邨居

平原蔓草路橫斜，寂寞依稀隱士家。山檻雨霏歸燕子，籬門風輒落桐花。床邊露滴春筍酒，燈下塵飛夜碾茶。白叟不知京洛事，瓦盆竹几樂年華。

莫止

四首

止字如山無錫人有南沙集

丁鑑卷十五
田按南沙詩琢句清新七律尤見雅裁

舟中望雲海亭時曙色未分風利不得泊

拂曙過清山荒亭杳靄間十年曾我到一日豈天慳湖面雲
增闊崖跟浪打頑興亡今古外鳬雁自飛旋

渠南一老亭次韻

石渠悠悠南有亭亭中人是少微星新添十竹皆紫玉恰對
九峯如畫屏觀物襟懷閒處愜倚床詩夢午時醒逍遙此是
長年國放蕩誰拘迹與形

次韻楊長史崇周閒居

庭草青青生煖煙壁間琴久欠徽絃箋天舊草三千疏漫興
新題一百篇林鳥巢多知地僻水花開晚爲誰妍到門溪漲

喧漁子涸鮒膠舟憶去年

寄龔時亨

背郭幽棲止數椽
安心調息引流年
午檐花動鳥窺戶
春渚艇橫風滿川
物妙每於閒處得
時情都向懶中捐
懷賢更有千秋興
細和陶詩手自箋

羅燾

四首

燾字元博上元人官光澤主簿有淵泉集

金陵瑣事羅主簿燾晚過東山寺云聞鐘知寺近逢
鹿覺山深宿高座寺云月來半榻寒松影風送滿山
秋葉聲
露書原博詩清新有致

野興

閒臨白石邊
竝立絕塵想
雲來綠樹迷
雨過蒼蘿長
遠村牧

笛鳴小浦漁歌響淹留歸去遲月照蘆花港

寂照寺訪僧不遇

慢轉青蘿徑閒敲白板扉雲關僧已出煙樹鳥爭飛苔色侵
經案松枝挂衲衣深林獨回首空翠落霏霏

秋晚秣陵道中

匹馬迢迢度遠村荒林煙火漸黃昏路經秋水橋全沒山帶
寒雲樹半吞蘆渚風生棲鷺鷥柴門人靜聚雞豚秣陵極目
增歸思暮景蕭蕭易斷魂

天闕山居次海峯韻

石磴雲深路轉斜地臨天闕隔塵譁秋來信步閒尋寺曉起
科頭自灌花詩就小童知捧硯客來鄰叟爲供茶山林真道

無交接門外時停長者車

錢百川 一首

百川字東之無錫人有寒齋狂稿

盛明百家詩東之少年學琵琶半日度四十曲人以爲神解詞賦多不傳晚宗陳白沙

村晚

埜店喚沽酒江船爭買茶東風吹浩浩西日下斜斜緩步隨流水狂歌踏落花欣然忘所去一笑過鄰家

陳蒙 二首

蒙字允德常熟人有泛雪集

田按允德詩宗四明蘇秉衡七絕殊有標致

題石田翁贈朱守拙小景

野藤刺水竹籬斜落盡東風枳橈花日午不聞茶臼響春城
買藥未還家

田按王漁洋謂藥花入詩多新異歷紀陳白沙恰到
溪窮處山山枳橈花楊夢山記得任家亭子上連翹
花發共銜杯楊升菴滿城幾日黃梅雨開徧金釵石
斛花予謂允德野藤刺水竹籬斜落盡東風枳橈花
尤有風致也

聞笛

落盡梅花雪滿庭故園楊柳夢中青羌兒馬上傳來曲今夜
關山月裏聽

張鈇一首

鈇字子威慈谿人有碧溪集

泊舟見桃花盛開

旅況託尊罍尊空愁更來人隨春燕去心與暮潮回驛鼓青
帆下橋燈水市開桃花明兩岸渾訝入天台

戴冠 一首

冠字章甫長洲人以貢授紹興府訓導有濯纓子集

嚴子陵墓

君臣垂令名千載不偶然先生固尙志光武亦下賢斯人化
去久清風播椒蘭灘水清見石客星長在天

徐岳 一首

岳福甯州人

福甯州志成化間有徐氏子名岳年七歲穎異過人
其父與客遊興慶寺客題詩壁上命岳和之岳題云
松竹寒仍秀梅花冷更香夜來三尺雪清曉玉爲堂

絕句

風雨惜春殘，閒庭獨閉關。
白雲飛去後，還我舊青山。

王烈

三首

烈字正邦，樂安人有。尋樂集十卷。

江西詩徵：正邦性敏，行篤鄉黨比之。王彥方弘治中，張東白薦修大明會典，徵至而卒。

田按：正邦詩有晚唐風致，惜未得其全集錄之。

遊桑林寺

江頭魚網雜魚竿，江畔幽人度竹關。
香積飯餘飛鳥散，瑤臺經罷老僧閒。
懶雲不雨歸方丈，小樹無枝著假山。
三笑桑林真落魄，暮潮猶帶夕陽還。

西隱寺

金輪峯畔舊招提，曲徑幽通古木齊。
萬壑煙雲山遠近，半空樓殿路高低。
篠簹廬地開花隴，石磴分泉出稻畦。
鐘杵晝閒禪意定，竹風檐鳥盡情啼。

青山菴

一道橋橫碧澗流，青山菴古白雲幽。
老松迸石矮遮屋，修竹接天高出樓。
日午麝香眠砌草，風低翠羽泊簾鉤。
狂夫野趣眞閑散，半百浮生漫浪遊。

晏良用一首

良用初名才正，字北山，新喻人。有北山漫稿。

山中次韻

結屋依雲靜，凭闌野興孤。
鶴聲煙樹遠，人迹雨苔蕪。
歲月雙

蓬巖溪山一酒壺老夫無俗累耕鑿是良圖

王鎰一首

鎰字美璞莆田人

蘭陔詩話美璞少有至性父母卒廬墓六年一夕樵人遺火燒山大雨倏至草廬無恙又有雙虎馴擾於墓側人稱爲王孝子列朝詩集錄宮詞一首未詳字里不可不亟爲表揚也

夜坐

對月坐來久懷人詩不成誰家吹鐵笛偏送斷腸聲

邢參二首

參字麗文吳人有處士集

列朝詩集麗文嘉遜城市以著述自娛徐昌穀祝希哲皆尙之嘗遇雪累日發無粟兀坐如枯林人往視之見其方苦吟誦所得句自喜昌穀爲作歌以申歡慕辭曰雲中鶴子鳴且蜚三三五五將焉歸歸在外

野獨徘徊從朝無梁暮不炊於何求乎蘆之漪我將
往饋糗中魚將子不飢兮我心愉

靜志居詩話麗文狷者除夜有海估以百金乞墓文
峻拒之抱膝擁衣飢以待旦明初高侍郎季迪有北
郭十友麗文亦有東莊十友吳燿次明文徵明徵仲
吳奕嗣業蔡羽九達錢同愛孔周陳涓道復湯珍子
重王守履約王寵履仁張靈孟晉故其詩云昔賢重
北郭吾輩重東莊胥會誠難得同盟詎敢忘

題東禪瑤公房

東城少僧寺賴此堪寄迹獨往路不迂營來意還適煖風逗
鶯花宿雨滋燕麥不有高閑徒憑誰話今夕

寄朱性甫

坐探詩翁興不孤野航隨處勘新圖春風蒲柳鵝肥蕩夜月
菱荷鶯脰湖雨地獨行堪貰酒一時相憶費操觚章涇流水
清如渭泛覽何人爲接軀

姚句一首

旬字用宣嘉興人丹邱先生綬子官鴻臚序班有觀

頤稿

錢福鶴集姚用宣詩宗杜字學沈民則以善書薦直仁壽殿

秋夜

水檻平添一尺波前溪坐見沒殘荷晚來雨過聞絡緯只有
荳花棚上多

吳珙一首

珙字鳳翔無錫人

送秦大參廷韶之閩

膏車秣馬促晨興且盡離筵酒數升賸有才名繼常袞可無

詩句弔嚴陵春耕農畝勞行部夜坐人家不禁燈別後有懷
空仰止閩山高出白雲層

鄭達 一首

達襄陽人崑山知縣

新燕

東風庭院柳飛花補得新巢日已斜莫把新愁向人說長安
有客正思家

羅周 一首

周字汝濟紹興山陰人處士絃子有梅隱稿十八卷
荔枝山鳥

雨過蠻溪歛瘴煙腥紅萬顆壓枝鮮誰知山鳥偷銜去又是

紅塵一騎前

崔徵一首

徵字淵甫吳江人國子監生有傳響集

靜志居詩話淵甫年未三十而天當其存日楊君謙
吳原博李貞伯都元敬沈啟南周伯器史明古諸君
皆與訂忘年之交原博尤重之呼爲崔小先生云集
中和唐詩多至三百七十餘首格守唐人矩矱而未
成變化使假之年當不止是此諸君重爲悼惜也

秋雁

迢遞辭邊塞聯翩入楚鄉江深空見影天闊遠成行暮雨愁
增繳秋風足稻梁數聲何處落應斷客中腸

趙善諫一首

善諫字景行廣州順德人有閑言集

漁人

浦口鳴榔急清江水漫流得魚便沽酒明月在扁舟

明詩紀事

貴陽陳田輯

東鑑

杭濟一首

濟字世卿宜興人弘治癸丑進士授吏部主事歷員外郎中出爲福建提學副使歷參政終布政使有澤西集

梅花卷

暗香疏影詩人句小閣春風畫裏看彷彿西湖冰雪裏一枝清瘦不勝寒

杭淮七首

淮字東卿濟弟弘治己未進士授刑部主事歷員外
出爲浙江按察僉事進副使改山東又改雲南歷湖
廣按察使山東河南布政使擢南太僕卿以都察院
右副都御史總督南京糧儲有雙溪集八卷

四庫總目淮與兄濟並負詩名與李夢陽徐禎卿王守
仁陸深諸人遞相倡和其詩格清體健在弘治正德
之際不高談古調亦不沿襲陳言頗諧中道
遵嚴集雙溪詩雖裁製錯出律調不同歸之嚴整雅
健體高而意正音舒而節越有前世作者之風
靜志居詩話雙溪詩極其道錄如繭絲抽自梭腸似
澀而有條理五言尤擅場可亞少谷
田按東卿詩不事叫囂自饒古格在七子派中與大
復昌穀爲近

送王文熙守制還家

春入燕關道草色青已齊
驪裏君馬白絡首南向嘶
倉皇攬

衣裳起餞不可攜別離亦已惡矧子在哀迷慘澹春日暮淚
落黃山溪

見李介菴卷因念其人賦此詩

濯濯楊柳枝開花大江隄轉盼春風顛飄泊岸東西美人隔
江水何當共襟期臨流和漁歌褰裳掇江蘼思之不可卽仰
視白日馳玄髮日已變夕惕恆自持願將青青柏遺君長相
思

再過浪滄橋

西行每濟此神魂欲驚飛下俯千尺濤橋柱浮傾欹捍聯四
鐵鎖歲久恐不持仰視壁巉竦上與浮雲齊霾日午氣昏挂
藤猿臂垂下馬爲歛足俯仰立嗟咨大江從西來萬派通番

夷兩崖似束縛不敢爲四馳
天空木葉下長風吹我衣蒼茫
絕域晚躑躅遊子悲

襄陽習池

青山愛峴首春風還習池
尙想山翁醉惟遺羊子祠巖花落
冉冉江柳垂絲絲亭臺斜日落
今古一長咨

送李獻吉餉軍甯夏

塘南淺淡野蓮白塘北高低秋蓼紅
思君只在別君處跨馬
時來月明中

送錢水部致仕還無錫

張公洞深白日裂吳溪水煥青蘋香
夢中風土亦不惡他日
與君俱故鄉

李少宰蒲汀送蟹兼有詩

江郭經霜正爾思青蒲束縛到堦墀開詩先已知風味不在持螯對酒時

韓邦奇一首

邦奇字汝節朝邑人正德戊辰進士除吏部主事歷員外言事謫平陽通判遷浙江僉事以裁抑中官下詔獄斥爲民起山東參議改山西乞休起四川提學副使入爲春坊右庶子謫南太僕丞起山東副使歷大理丞進少卿以右僉都御史巡撫宣府入佐院事進右副都御史巡撫遼東改山西引疾歸起故官督河道遷刑部侍郎改吏部拜南右都御史進兵部尙

書參贊機務致仕歸陝西地震死贈太子少保諡恭

簡有苑洛集二十二卷

四庫總目當正嘉之際北地信陽方用其學提唱海內
邦奇不相附和以著書餘事發爲文章不必沾沾求
合於古人而記問淹通凡天官地理律呂數術兵法
之屬無不博覽精思得其要領

田按正德中汝節官浙江僉事時中官採富陽茶魚
爲民害汝節作富陽諺哀之云富陽江之魚富陽山
之茶魚肥賣我子茶香破我家采茶婦捕魚夫官府
拷掠無完膚昊天胡不仁此地亦何辜魚胡不生別
縣茶胡不生別都富陽山何日摧富陽江何日枯山
摧茶亦死江枯魚始無山難摧江難枯我民不可蘇
中官王堂奏汝節阻格上俱作歌怨謗帝怒逮至京
下詔獄斥爲民

送錢銀臺自考功之南都

考功天部客長嘯出春明祖席開燕閣繁花發帝城晚風催
去舫新月照行旌聖主思弘化還應召賈生

韓邦靖 六首

邦靖字汝慶邦奇弟同榜進士授工部主事遷員外
應詔陳言繫錦衣獄奪職爲民起故官擢山西參議
有五泉集

苑洛集王九思曰五泉子七言絕句類杜子美古詞
歌洩淫唐初逼漢魏
列朝詩集汝慶才藻爛發
田按五泉子七古摹初唐極富才情五言亦窺盛唐
格律惟早傷衰折未見其止

玄明宮行

長安送客城東道柳葉楊花春正早玄明宮前下馬時一片
煙光暮青草宮中道士邀我入素菓清茶日未昃白河東下
楚城西指點湖山三歎息正德三年與四年劉瑾專權斧展

前可憐帝主推心腹縱有邱張豈比肩帷幄空多戚里恩論
思無復侍臣尊干官盡走東河下庶政全歸左順門震主傾
朝不自知回天轉日更誰疑金貂滿座銜恩日朱紱升堂頌
德時翻嫌仇李光榮薄卻笑曹侯意氣卑謀生已拙還謀死
更起玄明作蒿里甲第侯王已莫倫陰山將相那堪比土石
西山半欲摧棟梁南國萬牛同虛閭平臨金闕杪假山下指
鳳城隈琪花瑤草尋常得萬戶千門次第開千門萬戶何透
迤玉鼎瓊几更絕奇金人兩兩坐相向錦石亭亭立不危崇
垣豈止行千堵佳樹俄看大十圍玄明之宮高莫匹四海京
師皆第一金盃常思埋甲盾銅駝不解生荆棘自古威權不
到頭九重一怒罪人收幾年烈焰俱灰滅一旦冰山作水流

冰山烈焰事俱非座上門前客盡稀須臾蔓草縈枯骨宛轉
佳城屬羽衣門掩官河十里長山藏隴樹一千行今古誰存
三尺土姦雄空作百年忙春風有燕時雙入寒食何人奠一
觴低雲拂翠迷寒柳愁雨沾花落晚香臥牛不得歸岡勢怨
鶴空聞繞夕陽夕陽漠漠鶴歸遲卻憶玄明全盛時千人舉
杵萬人和九仞爲臺十仞池雨露霜羅歸喜怒層青丹碧豈
珍奇萬民累足臣屏息四海離心主不知倚社難薰古如此
操刀必割誰能已三穴那能窮帝旁萬幾况復歸司禮救枉
扶偏本不同更張琴瑟始成功還期聖主思前事莫遣玄明
有別宮一興一敗一登臨千樹千花笑古今崢嶸乍可誇豪
傑轉眼繁華日易沈

田按玄明官行自以空同大復爲連壁汝慶此作亦其亞也

送謝屯部之湖廣

謝子同官久春深獨遠行
山花孤棹發江草旅愁生
桂嶺通巴國岷江接漢城
登臨雲日暮何處是神京

送馬欽湖先生

當代文章客如君
生事微功名殊未達湖海意多違
行色萌春柳江聲轉夕暉
荆襄全盛地努力莫思歸

關中

蜀寇金州入邊兵鐵騎連
風塵迷故國消息斷殘年劍月明
三輔烽雲散八川西征推總制
勿使聖心懸

葉家樓

武皇北巡曾此駐蹕

一曲朱欄倚綠楊
葉家樓閣本尋常
曾看萬國來佳麗
不信當年駐帝皇
花繞香雲還五色
草和秋露但斜陽
江南江北無窮恨
八駿原誰馭穆王

春興

十里晴烟散薜蘿
輕寒乍煖試清和
柳眉杏臉桃花淚
各有春愁誰最多

方鵬一首

鵬字時舉崑山人
正德戊辰進士授南禮部主事
改南刑部歷員外郎中
改南兵部吏部出爲浙江參議
歷山西副使用薦改右春坊右庶子
兼翰林修撰遷南太常卿有矯亭存稿十八卷續稿八卷

丁籤卷十六

六

方鳳改亭續稿矯亭詩文平實典雅
靜志居詩話矯亭古詩効陶近體學白頗饒自得之
趣其自題小像云此像何人斯吳淞方矯亭頗記前
身事生可六七齡一疾遽天死天地為冥冥蒼頭抱
我哭諸婦痛拊膺其家乃城居面北高檐檻臨街列
屠沽陰風助哀聲思之宛如昨語及輒涕零性靈想
不寐還復得此生乃知記憶前身事匪獨鮑井羊環
也

秋野

涼雨經旬暑盡消
荻花楓葉暗溪橋
深深門巷迴車馬
浩浩江湖隔市朝
滿地秔稌喧鳥雀
幾家煙火混漁樵
非無使者
弓旌在水闊雲多不可招

方鳳 六首

鳳字時鳴鵬弟同榜進士除行人選監察御史有政
亭存稿十卷續稿六卷

田按改亭詩不事摹擬自饒香色

晚泊安陵

輕艘依樹泊小店枕流開城柝歸鴉散牆燈宿鷺猜風狂欺
客鬢酒薄減詩才怕是微茫月將愁入夢來

乘月登矯翁新疊山

有山不必論真假無客還須自主賓小洞著雲梅雨細方池
皺綠竹風勻一奩短髮閒邱壑半世高吟伴葛巾此夜躋攀
窮醉眼露華清淡月如銀

約段同年石庵游西湖

耿耿懷人百里心野塘秋水碧沈沈功名染指春雲薄尊酒
論文夜雨深白髮無情空貯藥青山隨處可攜琴翩翩野服

丁丑卷十六
乘新霽好向西湖續舊吟

送湯二尹歸兼簡彭子充

五袴歌謠滿路歧何來薏苡忽生疑
吳田春水留遺跡蜀道寒雲感去思
枳殼花飛風翦翦木蘭舟發雨絲絲
詩壇若見彭夫子爲說方干有夢馳

輓全虛舟

泛泛虛舟隨處泊伴雲出去伴雲還
詩狂酒興今何在月戶風簾夜不關
心事要論形迹外生涯長在有無間
若知羽化眞消息不用臨風兩淚潛

秋江

獨臥滄江秋已遲可無新酒伴新詩
生涯只在荻花渚日日

尊鱸不用思

傅汝舟

七首

汝舟字木虛一名舟侯官人有前邱生行已外編七
幅菴草吳游記唾心集步天集英雄失路集拔劍集
篋篋集吟藝存卷棄存稿烏衣燕子諸集

少谷集傅生詩淵致蕭散多發之性情其道江湖林
壑神仙隱逸直臻其要妙上下魏晉抗聲於武德天

寶之問大慙而還不論也

藝苑卮言傳汝舟詩如言法華作風話凡多聖少

小草齋詩話鄭繼之同時倡和諸子有傳山人汝舟

高山人澈林侍御銚許黃門天錫然皆格卑語俚不

能自振獨傳差有塵外之語如松花風送時入口竹

枝雲生常滿衣永夜松風掃星月經旬衾枕傍天河

天風驅雲不出洞家鶴拜客時登堂亦自蹠蹠可喜
李維禎大泌山房集遠度恆言七子如徐吳有氣體
無神骨近日袁中郎輩反是婁江厯下互有短長之
列朝詩集徐與公曰汝舟詩雖師鄭吏部而天然之

趣尤勝如雖貧一榻能高臥縱老名山欲遠尋焚香
漫與僧來往得句惟應弟唱酬郊原亂後飛燐火村
落年來變劫灰異書自得作者意長劍不借時人看
呼來鴻鵠添新侶拋去鸕鶿省舊糧新點玉書仙賜
讀舊趨瓊閣帝容歸等句吏部當爲卻步
問書武夷天心峰在火燄峰右象鼻巖左三峰屈曲
毗連如心字之形又此地深隱爲洞天中心嘉靖戊
子徵人韓洞虛鑿荒構屋張真人彥頤扁曰天心傳
汝舟詩朝登三仰峰夕宿天心庵久入名山遊溪徑
頗盡諸始知九曲外復有南山南森邃更險豁深篁
倚煙嵐沙田稻翼翼巖桂花毵毵疏籬隔雞犬朽樹
藏蜂窠

初度

明朝初度至覽髮奈年何歲旱龍無語吾衰鳳不歌巖齋孤

對海石榻絕攀蘿莫怪違時性山林自一科

登襄城

客子道路浮雲輕北風發發飄蠻荆二妃漢濱昔解佩龐公
襄陽今入城天清峴山水上出日倒習池花內明錯將玉笛
興此弄盡使九天驚鶴驚

擬築宛在堂奉招石門隱君

城外西湖煙霧光孤山宛在水中央門開獨樹懸青磴徑繞
千花上碧堂蘭艇桂櫓操自穩藥房荷榻臥偏長秋波不隔
尋眞路與興須君到隱鄉

陪汪郡公謁勉齋先生墓

先生墳在庖犧谷異代虛無草木閒俎豆自今開特廟衣冠

終古闕空山峰高元氣長
回地迴精靈定往還
淺薄叨陪堂下拜
幾瞻遺像愧塵顏

杜清碧故宅

不見平川杜伯原
社煙村靄自朝昏
徵君故宅遙相問
去國微言竟莫存
世亂冠裳終草莽
年深鄉井少兒孫
清江碧嶂愁看汝
夜雨寒燈夢掩門

送張文寺遊西湖

當年自署西泠長
近把蒲觴作臥遊
寄語孤山雙白鶴
主人歸矣不須愁

山居

竹下焚香對玉屏
春風池上酒初醒
閒箋一卷長生訣
解與

溪南白鶴聽

傅汝楫 一首

汝楫字木剡汝舟弟有臥芝集

閉門

頻年罷釀老愛酒客至無錢強出賒落盡庭梅三日雨香風
閒對一甌茶

明詩紀事

貴陽陳田輯

丁鑑

張詩三首

詩字子言本姓李宛平人有崑崙山人集

中麓間居集崑崙山人張詩在大梁與李空同歌詩
酬贈空同稱爲燕山豪士夜宴瓶芝忽墮以爲杵行
觴焉亦一奇事也與空同各作芝盤行俱有李杜風
骨孫太初作詩贈山人有張子自高格入山從我遊
山人怒曰吾豈汝門弟子耶從此絕交
今兩瑤華崑崙山人鏤金刻玉咀鳳含麟
藝苑卮言張子言詩如甘州石斗色澤如玉屑理鑿
漫

列朝詩集崑崙山人在武林時與孫太白論詩太白
自誇其青厓貼天日下照芝草斑之句不減曹氏父
子子言掉頭大笑太白爲之奪氣子言笑謂坐客今
日崑崙山壓倒太白矣

田按山人詩亦有奇致以較太初去之尙遠李開先推之過甚何耶

都下贈秦餘岳子

山色隨龍劍何時別五湖風塵萬人裏鸞鳳一身孤足躡煙霞具腰盤海嶽圖三秋今獨見莫惜倒金壺

崔西弢山中別起樓臺寄贈

山人習靜謝氛埃甲第遙從天上開流水自然成澗壑閒雲終日護樓臺珠簾度鶴窺金篆壁月穿花送玉杯鞭石不勞蓮島去吹簫時引鳳凰來

贈答秦餘寄山水畫圖

秦餘山人鸞鶴姿遙探江海躡靈芝醉圖萬疊丹邱狀樹是琳瑯瑤作池

鄭作二首

作字宜叔歛人有方山子詩選

空同集方山子詩才敏興速投筆輒成空同子每抑之曰不精不取乃兀坐沈思鍊句證體亦往往入格靜志居詩話宜叔詩頗俊利遠勝五岳山人

逢徐少卿

八年方把袂萬里只含情
已自忘顏面猶能記姓名
深杯照落日寒葉動秋聲
獨愧飛蓬影飄飄過此生

柬汪用夫

我歸嶺嶠雲生履君汎江天雪滿船
離思不堪還異地鄉愁無奈況殘年
海鷗笑客時能去山鬼吹燈夜不眠
一棹沙溪明月靜漁竿相把釣寒煙

程誥 三首

誥字自邑歙人有霞城集二十四卷

列朝詩集自邑居於泂溪自號泂溪山人杖策遊華山從李獻吉遊酬和於繁吹兩臺之間黃勉之諸人北學於空同者皆以自邑爲介然其詩殊有風調

東風

南郡非吾土東風慰久稽看花中酒後羸馬故城西郢樹連襄遠巴山到楚低王孫歸未得芳草自萋萋

咏史

易水長虹白將軍首入秦荆軻無劍術不是報讐人

送芸上人

行盡春山翠萬重新林浦月坐聞鐘橫江東去長鳴鶴巢寄

南朝第幾松

戚韶 一首

韶字龍囷松江華亭人有集

松風餘韻龍囷好古博雅與王良佐張冕並以詩名
孫文簡公初不深識龍囷作二詩送之北上文簡合
良佐與冕之詩並刻之曰三詩翁集

記事

人情洵洵語浮囂腹裏千愁豈易消戰艦未收河朔賊居民
虛斷潮西橋天須向曙星初滅樹未經秋葉已飄不似十年
前意況青樓明月喚吹簫

姜玄 一首

玄字玄仲吳江人

列朝詩集玄仲詩務雅澹極意陶鍊每成一詩輒復
捐去著思再三芒藻幾盡不爲時流所知蓋詩家之
逸民也

雜詩

諷討窮修暑頗悅古人情周楚先河濫漢晉浩波橫吐吞煙
霞混組繡陽春生妙化猶九轉巧拙非一程隋侯自朗瑩和
氏自溫明旣使瓴甌競又俾魚目爭所以絕琴者千載不復
鳴

童瑀一首

瑀字廷瑀蘭溪人自號耕樂子有耕樂子集

送蕭貴襄歸江西

白芷涼生八月秋尊鱸歸興滿扁舟風塵動是經年別尊酒

難爲十日留紅葉關河添客況黃花驛路使人愁從知此後
思君處多在斜陽古渡頭

趙香 一首

香字水巖東陽人

弔杜少陵

往事淒涼傷客心少陵遺蹟此沾襟百年多難悲鄉國萬里
長吟動古今秦地秋風茅屋破巴山落日草堂陰乾坤何處
孤舟寄江漢蕭蕭暮雨深

董璫 一首

璫字汝器蘭溪人貢生官東平同知

華溪

華溪釣隱誠自豪齊門操瑟非吾曹綸竿百尺水雲渺鐵筴一聲山月高放鶴引尋紫芝洞得魚醉臥滄江濤黃塵滿地不歸去萬里天風吹布袍

陳璽 一首

璽字德符閩人有守魯集

爲介菴叔父題畫屏

雪漫江天萬木落一閒茅屋覆詩翁何人醉醒梅花月踏徧寒山路幾重